



Opstaan

voor het
goede

Resúmen programa di elekshon
di partido ChristenUnie 2025

ChristenUnie

Introdukshon

Kon ta bayendo ku Hulanda? I ku bo?

Porta ta bayendo basta bon ku bo, pero bo ta preokupá tambe: lo mi tin vivienda aki un tempu, un trabou òf por hasi un estudio? Bo yunan tin un dushi grupo di amigu, pero den ki mundu nan ta lanta? Tin un lugá i apresio pa nos identidat, balornan i normanan kristian? Kiko ta e impakto di guera i violencia den mundu riba nos pais? I gobièrnu lo por solushoná nos problemanan? Polítika t'ei realmente pa mi? Òf kisas bo a stòp di kere den polítika i bo no ta interesá mes mas tampoko.

Nos di ChristenUnie ta traha duru, nos ta kuida, nos ta siña i nos ta kompartí. Miéntas nos ta hasi esaki, nos ta mira e problemanan grandi tambe. Soñonan i deseonan normal i humano ta sinti komo si fuera ku nan ta difísil pa alkansá. Lo básiko mes no ta parse opvio mas: un gobièrnu ku ta aktua, ku ta íntegro i hustu. Ku ta protehá loke ta vulnerabel, pero ku no ta tuma mas (espasio) ku ta nesesario. I ku ta honesto tokante loke no ta bai bon.

E balornan akí ta bou di preshon. Hopi biaha pa motibu di falta di vishon i interes propio. Ganamentu di plaka fásil ta kontaminá e ekonomia. Nos atenshon i tempu ta drai rondó di gana plaka lihé. Maneho di gobièrnu hopi biaha ta hasi e problemanan mas grandi i no ta yuda hende salí for di pèrtá. Polítikonan ta okupá nan mes mas ku e aktualidatnan.

Kambio ta kuminsá serka nos: hende di bon boluntat ku ta lanta para pa un otro, ku ta fiel na nan komunidad, ku ta skucha i ku ta sirbi. Hendenan ku ta bisa 'si' pa un pais kaminda tur hende tin balor i ku ta bisa 'no' na inhustisia. Hendenan ku ta mira kiko nos a pèrdè i p'esei ta lanta para pa loke ta bon. Ku den polítika ta buska e interes general i ta keda fiel na nan prinsipionan.

Pa e hendenan aki ChristenUnie ta un aliado. Motivá pa fe – no den nos mes, pero den Dios, den e otro persona i den e kosnan bon. Pasobra nos ta yama pa ta hustu, pa pone límite i pone normanan. Pa buska pas den nos pais, pa otro i pa e kreashon ku a wòrdu konfia na nos. Pa no konformá ku desunion i desigualdat. Tambe ora ku esaki ta difísil, laf òf impopular. Pasobra nos ta kere ku tur hende ta konta, i ku polítika por duna speransa.

Esaki mester kambia, pasobra nos a pèrdè hopi kaba.

P'esei nos ta lanta para pa mayornan i yunan ku ta keda pegá den sistemanan ku netamente mester tei pa protehá nan. Pa e boluntarionan,

Man na obra, simplifiká, i pone norma

esnan ku ta yuda ku idioma, e kuidoádonan, e lidernan di hubentut i e entrenadornan riba djasabra. Pa e maestro di skol, e enfermera i e empresario, ku tur dia ta hasi nan trabou ku alma i kurpa. Pa tur hende ku ta duna, sin pidi pa haña algu bek. Pa un gobièrnu ku ta skucha, ku ta duna kuenta i rason i ku ta sirbi. Pa un futuro ku ta honesto, abitabel i hustu pa tur hende.

Nos ta pone man na obra:

Krísis di bibienda

Nos lo konstruí 100.000 kas pa aña, kaminda ku dos terser parti lo ta pagabel pa hendenan ku tin un entrada normal.

Defensa i kolaborashon pa desaroyo

Hulanda lo kumpli kompletamente ku tur akuerdo i lo kumpli ku e normanan internashonal.

Kita Hulanda for di riba kandal

Nos tin kurashi pa tuma desishon: invertí den futuro, baha emishon dañino i traha lei ku realmente ta funshoná.

Nos ta simplifiká:

Sosten finansiero pa famia

Na lugá di e “kinderbijslag” i “kindgebonden budget”, ku tin awor aki, tur mucha lo haña €4.500 pa aña.

E sistema kompliká di impuesto, “toeslagen” i seguridat sosial

Nos lo remplasá e sistema kompliká di “toeslagen” ku un deskuento simpel di belasting. Bo no ta paga belasting riba e promé €30.000 ku bo ta gana pa aña.

Ménos burokrasia

pa empresario, organisashon sosial i boluntarionan.

Nos ta pone norma:

Introdusí sirbishi militar

hóbennan lo hasi un kontribushon sosial òf militar.

Kada bida ta konta

Eutanasia pa hubentut bou di 30 ku ta sufri di problema mental lo para te ora ku kuido ta mihó organisá.

Derecho riba reparashon

Produktonan mester ta duradero i mester por wòrdu drechá.

Konstruí komunidatnan

Na Hulanda tin falta di kasi 400.000 kas. P'esei nos ke konstruí 100.000 kas pa aña, bou di guiansa i direkshon di gobièrnu. E kasnan aki no ta solamente ta pagabel pero tambe duradero pa futuro, adekuá pa yòn i hende grandi. Hende grandi mester por muda mas fásil pa kasnan ku ta laga nan biba mas kómodo i konforme nan edat, pa asina bin mas espasio pa pa famianan i esnan ku ta kumpra un kas pa promé biaha. Gemeentenan ta risibí e tarea pa realisá sufisiente vivienda pa hende grandi i hòfinan.

Aparte di konstruí, e kalidat di e barionan ta para sentral. Bario i pueblitonan mester ta lugánan kaminda hende ta topa i kuida di otro. P'esei, ChristenUnie ke eliminá e regla di *kostendelersnorm*, duna hürdó mas seguridat, i pone enfoke riba 'Housing First' pa eliminá situashon ku hende ta keda sin kas. Iglesiasnan i organisashon di boluntarionan ta wòrdu rekonosé komo partnernan igual den komunidat. Ademas, pueblitonan i regionnan lo wòrdu reforsá: invershon den transporte públiko, skolnan chikí, skolnan avansá i kuido di salú lo ta nesesario pa mantené un bon abitabilidat. Na momentu di partimentu di supsidio pa kultura, nos ke un repartishon mas hustu den e pais.

Nos ta rekonosé e debe di honor na Groningen pa kousa di e eksplotashon di gas i nos ta skohe pa un manera bondadoso i humano pa yega na un areglo pa ku e daño ku a wòrdu kousá. Tambe lo tin invershon den Zeeland i otro regionnan, ku atenshon pa seguridat di awa, infrastruktura i kultura.

Kita Hulanda for di kandal

Hulanda ta mal pegá ku regulashon di stikstof (nitrógeno), un ret di koriente ku ta sobrekargá i un sistema di belasting kompliká. ChristenUnie ke redusí emishon di stikstof ku mitar i laga tur sektornan kontribuí. Kunukeronan lo haña metanan spesífiko pa nan kompania ku ta obligatorio i sosten pa konserbashon. Industria

i mobilitat tambe mester redusí nan emishon. Asina pèrmitnan por kuminsá bira disponibel atrobe.

E krísis di “netcongestie” ta wòrdu di hèndel dor di pone e maneho na nivel nashonal i dor di hasi invershonnan grandi den infrastruktura i almasenahe. Lo bai tin un ret di energia inteligente i fleksibel, ku prioridat pa vivienda, institushon di kuido i infrastruktura krítiko.

E sistema di belasting lo wòrdu revisá kompletamente. Toeslagen lo disparsé i ta wòrdu remplasá ku un sistema di *belastingkorting*. Ningun hende ta paga belasting riba e promé €30.000 di nan entrada. Lo tin un distribushon mas hustu entre trabou i kapital, i supsidionan ku ta kontribuí na daño di medio ambiente lo wòrdu kita. Ademas lo tin un dia di simplifikashon kada aña, kaminda gobièrnu ta obligá pa implementá simplifikashon nobo di e reglanan i sistemanan.

Mobilitat tambe mester kambia. Nos ke invertí den trayektonan di trèin nobo manera Lelylijn i Nedersaksenlijn, hasi transporte públiko mas barata i amplia e kamindanan pa kore baiskel i pa hende kana. Pa korementu di outo lo paga belasting segun e kantidat di kilometer ku ta kore, miéntras Schiphol lo kremp drástikamente i Lelystad Airport lo no habri. Konekshon di trein internashonal lo wòrdu fortifiká.

Un bon futuro pa nos yunan

Famianan ta e promé i mas importante den komunidat. Polítika mester sostené famia enbes di forsa mayornan pa traha fulltime. ChristenUnie ke duna famia mas espasio finansiero (€4.500 pa aña pa tur mucha, kuido di mucha grátis òf kasi grátis). I lo tin un meta legal pa eliminá pobresa infantil.

Lo tin mas enfoke riba sosten *pa kriansa*, yudansa pa relashon i yudansa preventivo pa detektá problema mas tempran. Areglo di verlòf lo bira mas simpel i mas amplio (en partikular pa mantelzorg i rouwverlof). Terapia di relashon (relatietherapie) lo bira mas aksesibel i pagá pa asina sostené famianan.

E influensia di media sosial lo wòrdu limitá. Media sosial lo wòrdu prohibí pa mucha bou di 14 aña, i lo no permití smartphone na skol. Plataformanan sosial lo haña reglanan mas estrikto pa verifikashon di edat i sensitivitat pa adikshon. Asina ChristenUnie ke kontribuí na un edukashon digital ku ta seif pa muchanan.

E interes di muchanan i paternidat (ouderschap) biológiko ta pará sentral pa loke ta trata legislashon di paternidat i utoridat di mayornan. Esaki ta nifiká ku muchanan ku ta bini di un donor òf ku a keda adoptá tin drechi pa sa nan desendensia. ChristenUnie ta a favor di un redukshon kuidadoso di adopshon internashonal.

ChristenUnie ta keda kontra draagmoederschap i donashon di spèrma komersial. Nos ta kontra regulashon di draagmoederschap kaminda e mucha no ta òf ta parsialmente genétikamente relashoná ku e mayornan ku kier un yu.

Mayornan por skohe libremente pa edukashon ku ta conforme ku nan fe òf vishon pedagógiko. Edukashon religioso den skolnan públiko lo wòrdu garantisá i transporte di skol pa mucha lo wòrdu protehá. Skolnan kaminda mucha ta logra bon resultado lo kompartí nan lèsnan ku otro skolnan. Nos ta sigui invertí den pre-educashon, edukashon tempran i edukashon pa personanan ku bin biba nobo den pais. Via finansiamentu i maneho dirigí kontra atrasonan na skol, nos lo pone mas fondo disponibel pa skol ku hopi desafionan i atraso. Gobièrnu ta soru pa tin sufisiente skol speshal den kada region, inkluso skol speshal di havo- i vwo kompletu. Den edukashon básiko lo tin den hinter pais sufisiente skol pa edukashon pa mucha (hopi) talentoso ku tin nesesidat di sosten èkstra pa asina prevení abandono di skol prematuro pa e grupo aki.

Un estado di derecho fuerte

ChristenUnie ta skohe pa fortalecé demokrasia i estado di derecho. Esaki ta nifiká protekshon di libertat fundamental, ta hustu pa siudadananan i invertí den e konfiansa entre pueblo i gobièrnu.

Nos ke hasi estado di derecho fuerte kontra daño, kriminalidat i interferensia di paisnan di afó.

Defensa lo risibí strukturalmente 3,5% di BBP pa hasi forsa armá mihó prepará pa futuro. Hulanda lo keda traha estrechamente ku NAVO i partnernan Europeo. Aparte di esaki, mester tin mas atenshon pa siguridat digital, menasa digital i protekshon di infrastruktura vital.

E laso ku parti Karibeño di Reino mester bira mas fuerte: invertí einan den edukashon, kuido i ekonomia, ku rèspèt pa e outonomia lokal. ChristenUnie tambe ke un mihó balans a den estado di derecho, ku atenshon pa víktimanan i un hustisia humano.

Balor di kada bida i bon kuido

ChristenUnie ta para pa protekshon di kada bida humano, for di komienso te na fin. Esaki ta nifiká invertí den kuido paliativo, mihó kuido pa nos grandinan i mas atenshon pa salú mental (GGZ). Personanan ku ta responsabel pa kuido di famia òf konosí lo wòrdu sostené i mester organisá kuido mas serka di e persona ku ta malu.

ChristenUnie ta keda reservá pa ku amplifikashon di eutanasia. Pa hóben bou di 30 aña ku ta sufri mentalmente, nos ke pone un paro temporal na eutanasia te ora ku e sistema di kuido mental ta na un mihó nivel. Tambe nos lo empeñá pa prevenshon, estilo di bida salú i sosten pa famianan ku mester di kuido.

Kuido pa kreashon

Tera a wòrdu konfia na nos pa nos trate ku kuidou. ChristenUnie ta skohe pa un polítika fuerte riba klima: redusí emishon ku mitar, mas invershon den energia duradero i protekshon di naturalesa i biodiversidat. Hulanda mester ta na kabes den akuerdonan di klima Europeo i mundial.



Den konstrukshon mester traha di un manera ku ta tene kuenta ku naturalesa i sirkular, evitando desecho i malgasto. Inovashon den material biológiko i sparmentu di energia lo keda stimulá. Seguridat di awa, prevenshon di inundashon i restourashon di áreanan natural ta keda prioridat.

Ekonomia bèrde i duradero

Ekonomia mester sirbi hende i kreashon. Kresementu por, pero mester ta duradero. ChristenUnie ta enfoká riba agrikultura sirkular, industria duradero i perspektiva pa kunukeronan, hortikultur i piskadó. Lo bin mas sosten pa inovashon i empresaría ku ta kontribuí na durabilidadat.

Transporte duradero lo keda stimulá: mas uzo di tréin, baïskel i vehíkulonnan eléktriko. Aviashon mester kremp i bira mas limpi, transporte marítimo interior mester bira duradero. Finansa públiko lo keda sólido i euro lo keda stabil.

Trabou balioso i fin na pobresa

Tur hende mester tin aksesu na un trabou ku ta bon i balioso. ChristenUnie ke garantisá seguridat di bida ku un salario mínimo ku ta sufisiente. Pobresa i debe lo wòrdu kombatí ku un mihó sosten pa sali for di debe, prevenshon i oumento struktural di entrada pa gruponan vulnerabel.

Trabou boluntario i organisashonnan sosial ta esensial i lo haña sosten i ménos preshon pa regla. Lo tin mas atenshon pa un balansu sano entre trabou i bida personal, ku espasio pa duna kuido boluntario i hasi trabou boluntario.

Pone límite, gana libertat

Libertat ta nifiká tambe pone límite na industrianan i práktikanan dañino.

ChristenUnie ke un komunidad sin droga, sin kasino, sin prostitushon i sin pornografia. Trafikashon i eksplotashon di hende lo wòrdu kombatí fuertemente. Dor di pone límite, nos ta gana libertat real: un komunidad kaminda hende por floresé sin dependensia i adikshon.

Hustisia mundial

Na nivel internashonal, ChristenUnie ta skohe pa solidaridat ku esnan mas pover i vulnerabel. Hulanda mester duna 0,7% di su BBP pa kolaborashon pa desaroyo i kontribuí na hustisia mundial. Nos ta enfoká riba pas, libertat di religion i protekshon di minorianan rònt mundu.

Polítika di migrashon mester ta humano: protekshon pa refugiadonan, pero tambe reglanan transparente i integrashon ku bista pa balor i normanan di sosiedat. Komersio i negoshi hustu ku Afrika i otro kontinentenan ta wòrdu stimulá, ku enfoke riba durabilidadat i igualdat.

Union Europeo mester bira un komunidad di balor ku ta promové demokrasia, estado di derecho i solidaridat, enbes di promové solamente merkadeo. Hulanda tin e ròl di ta konstruktivo i pa trese unidat den esaki.

Konklushon

Huntu nos ta lanta para pa un komunidad kaminda tur hende ta liber, por floresé i ta wòrdu hustu tratá. Asina nos ke ta bo aliado tambe. Bo ke sa mas tokante nos programa di elekshon òf informashon riba un tema spesífiko? Tuma kontakto ku nos.

info@christenunie.nl

[033 422 69 69](tel:0334226969)



Sta op

voor het goede

ChristenUnie